

Orientaziun en atmosfera detg calma

Sesida da la fracziun rumantscha

■ **(anr/fa) Cusseglia governativ Martin Jäger ha orientà a la fracziun rumantscha dal cussegl grond davart la situaziun dals meds d'instrucziun. Diversas dumondas ha fatg il president Jon Domenic Parolini.**

En vista a la discussiun actuala davart ils meds d'instrucziun en rg u en ils idioms ha envidà la fracziun rumantscha dal cussegl grond mardi saira il cusseglia governativ *Martin Jäger*. El ha orientà davart la situaziun actuala da quests meds. «Sco quai ch'el ha infurmà è il chantun londervi ad'edir il med d'instrucziun en rg per la novavla classa. Quai pareva a nus bun, uschia han quellas regiuns e vischnancas ch'èn restadas tar il rg era ils meds d'instrucziun necessari», di il president da la fracziun *Jon Domenic Parolini*. Uss è l'uffizi londervi ad edir ils meds per la matematica en ils idioms. Jäger ha ditg ch'i saja difficil da chattar persunas qualifitgadas per translatar. «Mia proposta d'incumbensar era al servezzan da traducziun chantunal da translatar meds d'instrucziun nun è sco ch'el ha ditg uschè simpla a realisar causa ch'i dovria era enconscienschas pedagogicas e na mo linguistas», menziuna Parolini, «jau sun tuttina da l'avis ch'i dess qua la pussaivladad da laschar translatar ad in linguist e suenter laschar controllar ad in pe-



Jon Domenic Parolini, il president da la fracziun rumantscha.

FOTO O. ITEM

dagog versà che la lingua correspundia al savair dals uffants.»

«In zic stut dal departement d'educaziun»

Martin Jäger ha orientà a la vengina da preschents ch'il chantun vegnia a reno-

var sco dumandà da la magistraglia ladina il med d'instrucziun Arch dals custabs per las emprimas classas en Engiadina e Val Müstair. El ha era infurmà ch'ins studegia uss en il departement, sch'ins veglia prender per tut ils meds d'instrucziun idiomatics sco basa ils meds d'in-

strucziun en rg u actualisar e modernisar ils differents meds d'instrucziun idiomatics existents. Quai ha fatg star stut al president da la fracziun rumantscha: «Jau hai ditg che sch'ins haja impundi uschè bleras finanzas per meds d'instrucziun attractivs en rg, alura stuessi bain

esser pussaivel da prender quels meds en rg ed als adattar en ils idioms.» Jäger ha infurmà ch'il model da coesistenza vegnia integrà en il plan d'instrucziun 21, per il qual la procedura da consultaziun en la Svizra tudestga ed en Grischun entschiva il mais zercladur. «Per instruir il model da coesistenza èsi sco ch'el ha ditg necessari da scolar la magistraglia, perquai èsi uss da guardar da na perder temp e preparar pass per pass tut quai ch'igl è pussaivel», è l'opiniun da Jon Domenic Parolini. La magistraglia en Surselva ed Engiadina preparan uss las glistas nua ch'els inditgeschan tgenins meds d'instrucziun idiomatics ch'els duvrassan. «Cur che tut quels puncts èn sclerids vegnan ins a guardar co als finanzia», di el, «la finamira è da stampar varsaquants meds d'instrucziun attractivs era en ils idioms.» Auter che avant dus onns, cur che la fracziun rumantscha aveva debattà davart rg u idiom en scola, era questa sesida serrada pels meds da massa pli quietta: «L'atmosfera era calma, ils preschents aderents tant da l'idiom sco era dal rg sco lingua d'alfabetisaziun han tadlà e s'han laschads orientar dal cusseglia governativ davart la material complexa meds d'instrucziun», concluda Jon Domenic Parolini.